

ጳውሎስ ኤፌሶና አሳስ ፃፊዳ ኪታ ጋሳ ቆፋ

ጳውሎስ ኤፌሶናን ዳዒያ አሳስ ፃፊዳ ኪታን ኡባሬ አሉዲ ፃሊዳባይ፡ «ዎዴይ ጋኪያ ዎዴ ያሳይ ፖላናው ቆፒዳ ቆፋይ፡ ሳሎኒኔ ሳባን ዳዒያ ሜዴቴላ ኡባይ ኪሪስቶሳፔ ጋርሳን ጊዳና ማላሳ» ያጊያ ቆፋ (1:10)። ሄሳ ቦላ ጉጂዲ ዬሱስ ኪሪስቶሳራ ዳዒያ ኢሲፊቴላን፡ አሳ ዜሬላ ኡባይ ኢሲኖ ጊዳና ማላ ሃ ጊታ ቆፋ ኦሶን ፔሻና ማላ ያሳ አሳ ሃሳዪሴስ።

ኤፌሶና ኪታ ኮይሮ ኪፊሊያን ፃፊይ ካራ ቆፋ ጊዲዳ ኢሲፊቴላባ ፃፋናው ደሚዳይሳ ዳልጊሲዲ፡ ያሳ አዎይ ባ አሳ ዋቲ ዶሪዳኮ፡ ኤንቲካ ኢያ ናባ፡ ዬሱስ ኪሪስቶሳን ባንታ ናጋራፔ ማርታ ዳሚዲ ዋኒዲ ላባ ኬዪዳኮኔ፡ ያሳ ጊታ ኡፋይሳ ቃላይ ጌሻ አያና ባጋራ ቱማ ጊዳይሲ ኤሬቲዳኮ ኦዴስ። ናምባንሉ ኪፊሊያን ቃሲ ፃፊይ ሃ ኪታ ናባቢያ አሳይ ባንታ ኢሲፊቴላ ዴዑዋን ኪሪስቶሳን ኤንታው ዳዒያ ኢሲፊቴላይ ቱማ ጊዳና ማላ ኤንቲ ዋኒዲ ዳናው ቤሲያኮ ቆፊሴስ።

አሳይ ኪሪስቶሳን ዳዒያ ኢሲፊቴላ ዋኒዲ ዳናው ቤሲያኮ ዲማ ዲማ ሌሚሶን ቆንጨሰ። ዎሳ ኬላ አሳቴላ ሌሚሶ ጊዲያ ዎዴ ኪሪስቶሲ ሄ አሳቴላሰ ሁዔ። ዎሳ ኬላ ጊምቤ ኬላን ሌሚሴቲያ ዎዴ ኪሪስቶሲ ሄ ኬላ ጎዳ ፃጹዋ ሚንሊያ ዋና ሹቻ። ዎሳ ኬላ ማቺን ሌሚሴቲያ ዎዴ ኪሪስቶሲ አዚናን ሌሚሴቲስ። ፃፊይ ኪሪስቶሳ ባጋራ ቆንጨዳ ያሳ አጾ ኬሃቴላ ዳር ናሺዲ ኦዲሼ፡ ጊዳይ ጨዋቲያ ሃሳያ ሃሳዬስ። ኢ ኡባባ፡ ኪሪስቶሳ ሰቁዋ፡ ኢያ ያርሼቴላ፡ ኢ ኢሚዳ ናጋራ አቶቴላ፡ ኢያ አጾ ኬሃቴላኔ ኢያ ጌሻቴላ ባጋራ ፃሊስ።

ኤፌሶና ኪታ አይፌ ቆፋታ

- ሳርሶ 1:1-2
- ኪሪስቶሳኔ ዎሳ ኬላ 1:3-3:21
- ኪሪስቶሳን ዳዒያ ኦራላ ዴዑዋ 4:1-6:20
- ኩሻ ቆፋ 6:21-24

1 ያሳ ሹኔን ኪሪስቶሳስ ዬሱሳ ሃዋሬ ጊዲዳ ጳውሎሳፔ፡ ኤፌሶናን ዳዒያ ጌሻታሲኔ ኪሪስቶሳስ ዬሱሳ አማኔይሳታስ ፃፊቲዳ

ኪታ።

2 ፆሳ ኑ አዋፔኔ ጎዳ ዬሱስ ኪሪስቶሳፔ አቆ ኬሃቴላይኔ ሳሮቴላይ ሂንቴው ጊድ።

ኪሪስቶሳን ዴዒያ አያና አንጂዋ

3 ሳሎን ዴዒያ አያና አንጂ ኡባን ኪሪስቶሳ ባጋራ ኑና አንጂዳ፣ ኑ ጎዳ ዬሱስ ኪሪስቶሳ አዋይ፣ ፆሳይ ጋላቴቶ።

4 ኑኒ ኢያ ሲንላን ጌሻታኔ ቦሬይ ባይናይሳታ ጊዳና ሜላ ፆሳይ አላሜይ ሜጴታናፔ ካሴ ኪሪስቶሳ ባጋራ ባ ሲቁዋን ኑና ደሪስ።

5 ፆሳይ ባ ሼኒያን ባ ደሲዳይሳዳ ዬሱስ ኪሪስቶሳ ባጋራ ኑና ባ ናይታ ኦላናው ካሴቲዲ ቆፒ ዋሊስ።

6 ፆሳይ ባ ሲቁያ ናዓ ባጋራ ኑስ ጮ ኢሚዳ አቆ ኬሃቴላይ ቦንቹታና ሜላ ሄሳ ኦሊስ።

7 ፆሳ አቆ ኬሃቴላ ዲሬቴላዳ ኪሪስቶሳ ሱላን ዋዜቲዲ ናጋራ አቶቴላ ዴሚዳ።

8 ባ አቆ ኬሃቴላ ጨንጫቴላኒኔ ኤራቴላን ኩንሊዲ ኑስ ኢሚስ።

9 ፆሳይ ባ ደሲዳይሳዳ ኪሪስቶሳ ባጋራ ኢያ ሼኒያ ጮራ ኑ ኤራና ሜላ ኦሊስ።

10 ዋዴይ ጋኪያ ዋዴ ፆሳይ ፖላናው ቆፒዳ ቆፋይ፣ ሳሎኒኔ ሳዓን ዴዒያ ሜጴቴላ ኡባይ ኪሪስቶሳፔ ጋርሳን ጊዳና ሜላሳ።

11 ኡባባ ባ ሼኒያዳ ኦሊያ ፆሳይ፣ ካሴቲዲ ባ ቆፒ ዋሊዳይሳዳ ኪሪስቶሳ ባጋራ ኑኒ ኢያባ ጊዳና ሜላ ኑና ደሪስ።

12 ሄሳ ኢ ኦሊዳይ፣ ኪሪስቶሳን ኡፋይሲ ዋሊዲ ናጎን ኮይር ጊዲዳ ኑኒ ፆሳ ቦንቹዋ ጋላታን ቆንጨሳና ሜላሳ።

13 ሂንቴካ ሂንቴ አቶቴላ ዋንጌላ፣ ሄሲካ ቱማ ቃላ ሲዒዳ ዋዴ ኪሪስቶሳ አማኒዴታ። ፆሳይ ሂንቴው ኢማና ጊዳ ጌሻ አያናን ሂንቴ አታሜቲዴታ።

14 ፆሳ ቦንቹይ ጋላቴታና ሜላ ፆሳይ ባ አሳ ዋዛና ጋካናው ጌሻ አያና ኑስ ኦይሉ ኦሊዲ ኢሚስ።

ጳጢሎሳ ዋሳ

15 ሄሳ ጊሾ፣ ጎዳ ዬሱሳ ሂንቴ አማኒይሳኔ ጌሻታ ኡባ ሂንቴ ሲቁይሳ ታ ሲዒዳ ዋዴ

16 ታ ዋሳን ሂንቴና ቆፓሼ ሂንቴ ጊሾ ፆሳ ጋላቴይሳ አጋቢኬ።

17 ጎዳ ዬሱስ ከሪስቶስ ያሳይ፣ ቦንቾ አዋይ፣ ያሳ ሂንቴ አሊ ኤራናዳ ጨንጨቴላኔ ቆንጨጭላ ኣያና ሂንቴው ኢማናዳ ታኒ ያሳ ዋሳይሰ።

18 ያሳይ ሂንቴና ፃጊዳ ኡፋይሳይኔ ጌሻቲ ላቲያ ቦንቾ ላታይ አይ ማላ ዳርኮ ሂንቴ ኤራና ማላ ያሳይ ሂንቴ ዋዛና ኣይፊያ ደያና ማላ ታኒ ያሳ ዋሳይሰ።

19 ቃሲ ኢያ አማኒያ ኑናን ኦሊያ ኢያ ዋልቃይ አይ ማላ አዲዳ ጊቴኮ ሂንቴ ኤራና ማላ ዋሳይሰ። ሄ ዋልቃይ ያኔቶናኔ ዳቡርና ዋልቃ። ሃ ኑናን ዳዒዲ ኦሊያ ዋልቃይኔ።

20 ከሪስቶስ ሃይቆፔ ዴንሊዲ፣ ሳሎን ያሳፊ ኡሻቻ ባጋራ ኡቲሲዳ ጊታ ዋልቃይ ኢሲኖ።

21 ኢያ ሱንሳይ፣ አይሴይሳታፔኔ ማታ አዋታፔ፣ ሃሪይሳታፔኔ ጎዳታፔ፣ ቦላ ጊዲዲ ሃ አላሚያ ፃላላን ጊደናሺን ሲንሳፊ ያና አላሚያንካ ሃራ ሱንሳታ ኡባፊ ቶቃ።

22 ያሳይ ኡባ ከሪስቶስ ቶሁዋፔ ጋርሳን ሃሪሲሰ፤ ቃሲ ዋሳ ከላን ኡባባን ጎዳ ጊደና ማላ ኢያ ሹሚሰ።

23 ዋሳ ከላይ ከሪስቶስ ኩሜሊ ኦሊያ ኢያ አሳቴላ። ማዴቴላይ ዳዒያ ቤሳ ኡባን ከሪስቶሲ ባ ሁዔን ኡባባ ከንሴይሳ።

2

ከሪስቶስን ሃይቆፔ ዳያ ፒኔሊ

1 ሃይሳፊ ካሴ ሂንቴ፣ ሂንቴ ናጋራኔ ሂንቴ ቆሁዋ ጋሶን ሃይቁዳይሳታ።

2 ሄ ዋዳ ሂንቴ ሃ አላሚያ ኢታ ኦጊያ ካሊዳታ። ጨርኩዋ ቦላ ዳዒያ ኣያና ዋልቃታ ሃላቃሴኔ ሃዒካ ያሳሰ ከቴቶና አሳ ሃሪያ ኣያናሰ ከቴቲዳታ።

3 ኑ ኡባይካ ካሴ ሄ አሳታ ጊደን ኑ አሾ አሙዋኔ ኑ ዋዛና ሺኒያ ካሊዲ ዳዒዳ። ኑካ ሃራታ ማላ ኑ ማዴቴላን ያሳ ሃንቁዋ ኤካናው ዳዒይሳታ።

4 ሺን ያሳ ጊታ ማርቴላፊኔ ኑሰ ዳዒያ ጊታ ሲቁዋፔ ዳንዲዳይሳን።

5 ሃሪ አቶሺን ኑኒ ኑ ቆሁዋን ሃይቁዲ ዳዒሺን ከሪስቶስ ባጋራ ኑሰ ዳያ ኢሚሰ። ሂንቴካ አቲዳይ ያሳ አዶ ከሃቴላና።

1:20 ማዝ 110:1 1:22 ማዝ 8:6፤ ቆላ 1:22-23፤ 1:18 2:1 ቆላ 2:13

6 ያሳይ ኑና ኪሪስቶሳራ ኢሲፌ ሃይቆፔ ዳንጢዲ ሳሎ ሶሁዋን ኢያራ ኢሲፌ ዋሊስ።

7 ኢ ሄሳ ኦሊዲይ፣ ኪሪስቶስ ዩሱሳ ባጋራ ኑስ ቆንጨሲዲ ባ ከሃቴላኔ ዛዊ ባይና ባ ኣቶ ከሃቴላ ዲሬቴላ ያና ላይላን ኑና ቤሳናሳ።

8 ሂንቴ ኣቶ ከሃቴላን ኣማኖን ኣቲዳታ። ሄሲካ፣ ያሳ ኢሞታፔ ኣቲን ሂንቴ ኦሶን ቤንቲዳባ ጊዳና።

9 ኣኒካ ጨቁቶና ሜላ ኣቶቴላይ ቤንቲዳይ ኦሶን ጊዳና።

10 ኑኒ ያሳ ሜዴቴላ፤ ኢ ኑስ ካሴቲዲ ገገሲ ዋሊዲ ሎዎ ኦሶታ ኦላና ሜላ ኪሪስቶስ ዩሱሳ ባጋራ ኦራሊ ሜዴቴዳ።

ኪሪስቶሳራ ዳዒያ ኢሲፌቴላ

11 ሄሳ ገሾ፣ ሂንቴና ዩሌታን ኣይሁዳ ገደናይሳቶ፣ ኣይሁዳቴ ባንታው ኣሳ ኩሸን ቃፃሬቲዲ፣ ሂንቴና ቃሲ ቃፃሬቲቦናይሳታ ገዲ ዌይይሳ ኣክኪቲ።

12 ሄ ዎዴ ሂንቴ ኪሪስቶሳፔ ሻኬቲ ዳዒዳይሳ፣ ኢሰራዔሌ ኣሳስ ኣላጋ ገዲዲ ዳዒዳይሳ፣ ያሳ ኡፋይሳ ቃላፔ ሃኪዲ ዳዒዳይሳኔ ሃ ኣላሚያን ኡፋይሳኔ ያሲ ባይና ዳዒዳይሳ ኣክኪቲ።

13 ሺን ሂንቴ ካሴ ሃኪዲ ዳዒዳይሳቲ፣ ሃዒ ኪሪስቶስ ዩሱሳን ዳዒዲ ኪሪስቶሳ ሱላን ማታ ሸቂዳታ።

14 ኪሪስቶሲ ኑ ሳርቴላ፤ ኢ ኣይሁዳኔ ኣይሁዳ ገደና ኣሳ ቲሚዲ፣ ናምዓ ሻኪ ዋሊዲ ሞርኬቴላ ጎዳ ላሊስ።

15 ኢ ባናን ሃ ናምዑ ዛሬታፔ ኢሲ ኦራላ ኣሴ ሜዲዲ፣ ሂጊያ ኢያ ኪታራኔ ዎጋታራ ኢሲፌ ባ ኣሳቴላን ቆይሲዲ ሳርቴላ ኢሚስ።

16 ኪሪስቶሲ ማስቃሊያ ቦላ ሃይቂዲ ሞርኬቴላ ቆይሲስ፤ ቃሲ ናምዑ ዛሬታ ኢሲ ኣሳቴላ ኦሊዲ ያሳራ ሲገሊስ።

17 ኪሪስቶሲ ዩዲ፣ ያሳፌ ሃኪዲ ዳዒያ ሂንቴው፣ ቃሲ ማቲዲ ዳዒያ ኤንታው ሳርቴላ ዎንገላ ኦዲስ።

18 ኑ ኡባይ ኢያ ባጋራ ኢሲ ኣያናን ኣዎ ሲንፌ ሸቃናው ዳንዳዎስ።

19 ሂዛፔ ሂንቴ ኣላጋ ዎይኮ ኢማፌ ገዴኬታ፣ ሺን ሂንቴ ሃዒ ገሻታ ቢታ ኣሲኔ ያሳ ሶ ኣሲ።

20 ሂንቴ ሃዎሬቲኔ ናቤቲ ባሲዲ ባሱዎ ቦላ ከፃቲዳታ። ጎዳ ፃጶዎ ሚንሊያ ሹቻይ ኪሪስቶስ ዩሱሳ።

21 ኢያን ከላ ኡባይ ኢሲፌ ኦይኬቲዲ ጎዳን ጌሻ ያሳ ከሌ ጊዳናው ዲጩሰ።

22 ሂንቴ ቃሲ ያሳይ ባ ኣያናን ዳዒያ ከሌ ጊዳናው ኪሪሰቶሳን ኢሲፌ ከፃቴታ።

3

አይሁዳ ጊዳና ኣሳስ ሃዋሪ ጊዲዳ ጳውሎሳ

1 ሄሳ ጊሾ፣ ታኒ፣ ጳውሎሲ፣ አይሁዳ ጊዳና ሂንቴ ጊሾ ኪሪሰቶስ ዬሱሳን ቃሾ ኣሲ ጊዳሰ።

2 ታ ሂንቴና ማዳና ማላ ያሳይ ባ ኣቶ ከሃቴላን ታው ኢሚዳ ሃ ኦሱዋባ ሂንቴ ሎይሌ ሲዒዴታ።

3 ታ ሂንቴው ካሴ ቃንላን ፃፊዲይሳዳ ያሳይ ባ ፀራ ቆንጩላን ታው ቆንጩሲሰ።

4 ታ ፃፊዲይሳ ሂንቴ ናባቢያ ዎዴ ኪሪሰቶሳ ፀራ ታ ኣይ ማላ ኤሪዳኮ ሂንቴ ኣኬካናው ዳንዳዔታ።

5 ሃ ፀራይ ጌሻ ሃዋሪታሲኔ ናቤታስ ሃዒ ኣያና ባጋራ ቆንጩዲይሳዳ ቤኒ ዎዴ ኣሳስ ሄሳዳ ቆንጩሲቤና።

6 ፀራይ ሃይሳ፡ አይሁዳ ጊዳና ኣሳይ ዎንጌላ ባጋራ ኢሰራዔሌታራ ኢሲፌ ያሳ ኣንጂዋ ላቶሶና። ኢሰራዔሌታራ ኢሲ ከላ ኣሲ ጊዳሶና፤ ኪሪሰቶስ ዬሱሳ ባጋራ ያሳ ኡፋይሳ ቃላ ኤኮሶና።

7 ያሳይ ባ ኦሲያ ዎልቃ ባጋራ ታው ኢሚዳ ኣቶ ከሃቴላን ሃ ዎንጌላስ ኦሳንቾ ጊዳሰ።

8 ታኒ ጌሻታ ኡባፌ ላፋ ጊዲኮካ አይሁዳ ጊዳና ኣሳስ ዛዋ ባይና ኪሪሰቶሳ ዱሬቴላ ዎንጌላ ኦዳና ማላ ሃ ኣቶ ከሃቴላይ ታው ኢሚቲሰ።

9 ቃሲ ካሴ ዎዲያን ኡባ ማዲዳ ያሳን ቆሴቲዲ ዳዒያ ፀራሰ፣ ያሳ ቆፋይ ኣይቤኮ ቆንጩሳናው ኣቶ ከሃቴላይ ታው ኢሚቲሰ።

10 ያሳይ ሄሳ ኦሲዲይ ሃዒ ዎዲያን ዎሳ ከላ ባጋራ ሳሎ ሶሁዋን ዳዒያ ሃላቃታሲኔ ሃሬይሳታስ ባ ዱማ ዱማ ቆንጩላ ኤሪሳና።

11 ያሳይ ባ ሜሪና ቆፋ ኑ ጎዳ ኪሪሰቶስ ዬሱሳ ባጋራ ፖላናው ሄሳ ኦሲሰ።

12 ኑ ኣማናን ያሺ ባይና ያሳኮ ሺቃና ማላ ኪሪሰቶሲ ኑስ ሚኖቴሌኔ ላዓቴሌ ኢሚሰ።

3:4 ቆላ 1:26-27

13 ታኒ ሂንቴ ጊሾ ዋዬ ኤኪያ ጊሾ ሂንቴ ታ ዋያን ዬላቶናዳ ሂንቴና ዋሳይሰ፤ ታኒ ሂንቴ ቦንቹዋሰ ዋዬታይሰ።

ኤፌሶና ኣሳሰ ዋሴቲዳ ዋሳ

14 ታኒ ኣዋ ሲንላን ጉልባታዳ ዋሴይ ሄሳ ጊሾሳ።

15 ሳሎኒኔ ሳዓን ዳዒያ ኢሲ ኢሲ ሶ ኣሳይ ኢያን ሱንጤቴሰ።

16 ያሳይ ባ ቦንቹ ዲሬቴላፌ ሂንቴ ጋርሳ ኣሳቴላ ሚንሱያ ዋልቃ ባ ኣያና ባጋራ ኢማና ሚላ ሂንቴው ዋሳይሰ።

17 ቃሲ ኣማኖን ኪሪሰቶሲ ሂንቴ ዋዛናን ዳና ሚላኔ ሂንቴ ሲቆን ፃጶ ዬዲዲ ሚኒዲ ዳና ሚላ ዋሳይሰ።

18 ሂሳዳካ፣ ኪሪሰቶሳ ሲቆይ ኣይ ሚላ ዳልጌኮ፣ ኣዲሴኮ፣ ቶቆኮኔ ጨዋኮ ጌሻታ ኡባራ ኤሪያ ዋልቃ ሂንቴ ኣኬካና ሚላ ዋሳይሰ።

19 ኤሪቴላፌ ኣጲያ ኪሪሰቶሳ ሲቆዋ ሂንቴ ኤሪና ሚላ ቃሲ ዳዖ ኢሚያ ያሳ ዋልቃን ሂንቴ ኩማና ሚላ ታ ዋሳይሰ።

20 ሂዛ፣ ኑ ጊዶን ኦሊያ ባ ዋልቃ ባጋራ ኑኒ ዋሴይሳፌ ዋይኮ ቆፔይሳፌ ኣሊዲ ኦላናው ዳንዳዒያ ያሳሰ።

21 ዋሳ ኬላኒኔ ኪሪሰቶሰ ዬሱሳን ዋዴ ኡባን ሚሪናፔ ሚሪና ጋካናው ቦንቹይ ጊዶ። ኣሚንዒ።

4

ኪሪሰቶሳራ ዳዒያ ኢሲፌቴላ

1 ሂዛ፣ ጎዳ ጊሾ ቃሼቲዳ ታኒ፣ ሂንቴ ፃጌቲዳ ፃሳሰ ቤሲያ ዳዖ ዳና ሚላ ሂንቴና ዋሳይሰ።

2 ሂንቴ ኡባ ዋዴ ኣዳኔ ሃዮ ጊዲቲ፤ ኢሶይ ኢሱዋ ዳንዳዒቲኔ ሲቆን ዳዒቲ።

3 ሳርቴላን ቃሼቲዲ ኣያናይ ኢሚያ ኢሲፌቴላ ናጋናው ሚኒቲ።

4 ያሳይ ሂንቴና ፃጌዳ ዋዴ ኢሲ ኡፋይሳሰ ፃጌዳይሳዳ ኢሲ ኣሳቴላኔ ኢሲ ኣያኒ ዳዒሰ።

5 ኢሲ ጎዳይ፣ ኢሲ ኣማኖይኔ ኢሲ ፃንቃቲይ ዳዒሰ።

6 ኡባፌ ቦላ ጊዲዳ፣ ኡባ ባጋራ ኦሊያኔ ኡባ ጊዶን ዳዒያ ኢሲ ያሳይ፣ ኡባ ኣዋይ ዳዒሰ።

7 ሺን ኪሪሰቶሲ ኢማናው ኮዬዳይሳዳ ኑ ኢሶይ ኢሶይ ዲማ ዲማ ኢሞታ ኤኪዳ።

8 ሂሳ ጊሾ፣ ያሳ ቃላይ፣

«ኢ ፑዴ ከዬዳ ዋዴ ዲዒቲዳ ዳርታ ባራ ኤኪዲ ቢሰ፤

አሳሰካ አሞታ አሟሰ»

ያጌሰ።

9 ያቲን፡ «ፑዴ ከደሰ» ጉሳይ ዋይ ጉሴ? ኢ ኮይር ዳጌ፡ ሳዓ ዚቃ ቤሳ ዋዲሰ ጉሱ ጊደና ኢዲኮ ኣይ ጉሴ?

10 ሃ ዲጌ ዋዲዳይሲ፡ ኡባ ቤሳን ቤንታናው ኡባፌ ቶቃ ሳሉዋ ከዩዳይሲ ኢያ።

11 ኢ ኢሶታ ኢሶታ ሃዋሬታ፡ ኢሶታ ኢሶታ ናቤታ፡ ኢሶታ ኢሶታ ዋንጌላ ሳባኬታ፡ ኢሶታ ኢሶታ ዋሳ ኬሌ ሄሜይሳታ፡ ኢሶታ ኢሶታ አሰታማሬታ ኦሌዲ አሟሰ።

12 ኢ ሄሳ ኦሌዳይ ኪሪሰቶሳ አሳቴሌ ጊዲዳ ዋሳ ኬሌ ዲቻናዉኔ አማኒያ አሳ ያሳ ኦሶሰ ገጊሳናሳ።

13 ሄሳዳካ፡ ኑ ኡባይ ያሳ ናዓ ኤሪዲ አማኖን ቤንቲያ አሲፊቴላኮ ጋኪዲ፡ ኪሪሰቶሳ አያና ዴዐቀ ኩሜላ ጋኪዲ ዲጫና ማላሳ።

14 ሂዛፔ ጉዬ፡ አሳ ጌኔ ጨሞን ገጊዳ ባሌሌያ ዋርዶ ቲሚርቲ ጫርኮኒኔ ሆቤን ጌዴኔ ሃ ኩሎ ካዲያ ናይታ ማላ ጊደናው ቤሴና።

15 ሺን ኑኒ ቱማ ሲቆን ኦዲሼ አሳቴላሰ ሁዔ ጊዲያ ኪሪሰቶሳራ ዴዲያ አሲፊቴላ ጉጂ ጉጂ ዲቾሰ።

16 ኩሜላ አሳቴላይ ኪሪሰቶሳ ቦላ ዜምፕሰ ቃሲ ዴማ ዴማ አሳቴላ ቢለቲቲ ኢሶይ ኢሱዋራ ኦይኬቲዲ ኡቲሰ። ኢሲ ኢሲ አሳቴላ ኪፊሌይ ባ ኦሱዋ ኦሌያ ዋዴ ኩሜላ አሳቴላይ ሲቆን ዲጩሰ።

ኪሪሰቶሳን ኦራላ ዴያ

17 ሄሳ ገሹ፡ ታኒ ሃይሳ ሂንቲው ጎዳ ሱጎላን ኦዳይሲኔ ማርካታይሰ። ጎዲ ባይና ቆፋ ቆፒያ አይሁዴ ጊደና አሳታዳ ዴያፒቲ።

18 ኤንታ ቆፋይ ቋሚሰ፤ ባንታ ዋዛና ሙሚሲደሶና። ኤንቲ ኤራቴላ ቋዮኒኔ ኢፃሰ ጊዲ ያሳይ አሟያ ዴዐቀፕ ሃኪደሶና።

19 ኤንቲ ዬላ ጊያባ ኤርኮና፤ ኤንቲ ላይማቴላሰ ባንታና አሌ አሚደሶና፤ ቃሲ ቲናባ ኡባ ጉዬ ጎና ኦሶሶና።

20 ሺን ሂንቲ ኪሪሰቶሳ ኤሪዳይ ሄሳ ማላ ኦጌን ጊደና።

21 ኢያባ ቱማ ሲዲዴታ። ቃሲ ዬሱሳን ዴዲያ ቱማ ማላ ኢያፕ ታማሪዴታ።

22 ሂንቲ ካሴ ዴዲያ ዴያ ኦጊያ አገቲ። ቃሲ ባ ጨሚያ አሞን ቋያ ሂንቲ ጩጋ አሳቴላ ዲገቲ።

- 23 ሂንቴ ዋዛና ቆፋን ኦራዊቴ።
- 24 ቱማ ዲሎቴላኒኔ ገሻቴላን ያሳ ለሚሶን ማዴቲዳ ኦራላ አሳቴላ ማዲቴ።
- 25 ሂዛ፣ ዋርዶ ኦዴቶፊቴ። ኑኒ ኡባይ ኪሪሰቶሳ አሳቴላ ቢሊቴታ ጊዲያ ጊሾ አሳ ኡባራ ቱማ ኦዴቲቴ።
- 26 ሃንቄቲቴ፣ ሺን ሂንቴ ሃንቄዋን ናጋራ ኦሶፊቴ። ሂንቴ ሃንቄቲ ዴዲሺን አዊ ወሎፎ።
- 27 ፃላሂሰ ቤሴ አሞፊቴ።
- 28 ካይሲያ ኡሪይ ሂዛፔ ጉዬ ካይሶቶፖ። ሺን ማንቆታ ማዲያባይ ኢያው ዳና ማላ ባ ኩሺን ሎዶባ ኦሶ።
- 29 ሂንቴ ዶናፔ ኢታ ቃሊ ኬዮፖ። ሺን ሲዴይሳታ ጎዳና ማላኔ ሃራታ ማንሌልያ ኮሺያ ሎዶ ቃሊ ሂንቴ ዶናፔ ኬዮ።
- 30 ያሳይ ሂንቴና ዋዚያ ጋላሳሰ ሂንቴና አታሚዲ ዋሊዳ ያሳ ኢያና አዛንሶፊቴ።
- 31 ጫማቴላ፣ ዪሎ፣ ሃንቆ፣ ዋሶ፣ ጫሼኔ ኢታ ኡባ ሂንቴፊ ሃሰቴ።
- 32 አሊዲ ኢሶይ ኢሱዋሰ ኬሃኔ ቃዴቴይሳታ ጊዲቴ። ያሳይ ኪሪሰቶሳ ባጋራ ሂንቴው አቶ ጊዲይሳዳ ሂንቴካ ዋሊሰ አቶ ጊቴ።

5

- 1 ሂዛ፣ ያሳይ ዶሲያ ናይታዳ ኢያ ዳኒቴ።
- 2 ኪሪሰቶሲ ኑና ዶሲዲ ባና ኑ ጊሾ ያሳሰ ሳዊያ አሞኔ ያርሾ አሊዲ አሚዳይሳዳ ሂንቴካ ሲቆን ዳዲቴ።
- 3 ሺን ላይማቴላ፣ ቱናቴላኔ ኡዜቴላ አማኒያ አሳሰ ቤሶና ጊሾ ሂንቴ ጊደን ኡባራካ ሲዔቶፎ።
- 4 ያሳ ጋላቲቴፔ አቲን ዩላያባይኔ ኤያ ኦዲ ዋይኮ ቁዴይ ሂንቴው ቤሶና ጊሾ ሂንቴ ጊደን ኡባካ ዳዶፖ።
- 5 ሃይሳ ኤሪቴ፤ ኦኒካ ላይማቴይ ዋይኮ ቱናባ አሌይ ዋይኮ ኡዜቴይ ኪሪሰቶሳ ካዋቴላኔ ያሳ ካዋቴላ ላታናው ዳንዳዔና። ኡዜቴላ ኤቃ ጎይሮ ማላ።
- 6 ሃይሳታ ጋሶን ያሳ ሃንቆይ ኪቴቶና አሳ ቦላ ያና ጊሾ ኦኒካ ሂንቴና ፓሶና ኦዳን ጨሞፎ።
- 7 ሂሳ ማላ አሳራ ኢሲፊቴላ ኦሶፊቴ።

8 ካሴ ሂንቴ ቆማን ደዒዳታ፣ ሺን ሃዒ ጎዳ ባጋራ ፖንን ደዒታ። ሂዛ፣ ፖን አሳዳ ፖንን ሲሜሪቴ።

9 ፖንይ ሎፖቴሊ፣ ደሎቴሊኔ ቴማቴሊ ኣይፌሰ።

10 ጎዳ ኡፋይሲያ ባ አፋናው ኮዩቴ።

11 ጎዒ ባይና ቆማ ኦሶ ቆንጨሲቴቴ ኣቴን ኢያራ ኢሲፎፒቴ።

12 ኤንቴ ጌማን ኣሊያ ኦሶ-ዋ ሃሪ ኣቶሺን ኦዳናዉካ ዬላዬሰ።

13 ሺን ኡባባይ ፖንን ኬያ ዋዴ ቆንጨን ቤንቴሰ።

14 ፖንይ ኡባባ ቆንጨን ቤሴሰ። ሄሳ ጊሾ፣

«ኔኖ ሲሰኬይሶ ባርካ፤

ሃይቆፕ ደንዳ፤

ኪሪሰቶሲ ኔ ቦላ ፖናና» ያጌቴሰ።

15 ሂዛ፣ ሂንቴ ዋኒዲ ደዒያኮ ኣኬኪ ቤዒቴ። ጨንጫታ ጊዲቴቴ ኣቴን ኤያታ ጊዶፒቴ።

16 ላይላይ ኢታ ጊዲያ ጊሾ ኢንጃቴያ ዋዴ ኡባ ጎዒቴቴ።

17 ሄሳ ጊሾ፣ ጎዳ ሸኔይ ኣይቤኮ ኣኬኪቴቴ ኣቴን ኤዮፒቴ።

18 ጌሻ ኣያናን ጋላሰ ጋላሰ ኩሚቴቴ ኣቴን ቆዮኮ ሂንቴና ካሊሊያ ጊሾ ዋይኔ ኡሻን ማሶቶፊቴ።

19 ማዝሙራን፣ ሳባኒኔ ኣያና ዬሳን፣ ኢሶይ ኢሱዋራ ኦዴቴቴ። ቃሲ ሂንቴ ዋዛናን ዛማሪሽኔ ሳቢሽ ጎዳ ጋላቴቴ።

20 ኑ ጎዳ ዬሱሰ ኪሪሰቶሳ ሱንሳን ኡባ ዋዴ ያሳ ኣዋ ኡባባሰ ጋላቴቴ።

21 ኪሪሰቶሳ ቦንቹዋሰ ጊዲ ኢሶይ ኢሱዋሰ ሃራቴቴ።

ኣዚናባኔ ማቹባ

22 ማቹቶ፣ ጎዳሰ ሃራቴይሳዳ ሂንቴ ኣዚናታሰ ሃራቴቴ።

23 ኪሪሰቶሲ ዋሳ ኬላሰ ሁዔ ጊዴይሳዳ ኣዚኒካ ባ ማቹሰ ሁዔ። ቃሲ ኪሪሰቶሲ ባ ኣሳቴሊ ጊዲዳ ዋሳ ኬላ ኣሽይሳ።

24 ሺን ዋሳ ኬላይ ኪሪሰቶሳሰ ሃራቴይሳዳ ማቹቲ ባንታ ኣዚናታሰ ኡባባን ሃራጋናው ቤሴሰ።

25 ኣዚናቶ፣ ኪሪሰቶሲ ዋሳ ኬላ ዶሲዲ ባና ኢው ኢሚዲይሳዳ ሂንቴካ ሂንቴ ማቹታ ዶሲቴ።

26 ኢ ዋሳ ኬላ ባ ቃላ ባጋራ ሃላን ሚጨዲ ጌሺሰ።

27 ኪሪሰቶሲ ዋሳ ኬላ ቂቲ ዋይኮ ሶምዖ ቱሲ ዋይኮ ሄሳ ሚላባይ ባይና ኢ ኩሜላ ቦንቹዋራ ጌሺኔ ቦሬቶናሮ ኣሊዲ ባኮ ሺሻናው ኮዩዲ ሄሳ ኣሊሰ።

28 ሄሳዳካ፣ አዚናቲ ባንታና ደሴይሳዳ ባንታ ማቼታ ደሳናው ቤሴስ። ባ ማቼው ደሴይሴ ባና ደሴስ።

29 ባና ኢዲያ አሲ ኦኒካ ባዋ፣ ሺን ኪሪስቶሲ ዋሳ ኩላስ ኦሴይሳዳ ባ አሳቴላ ሙዜሴኔ ናጌስ።

30 ኦኒ ኪሪስቶሳ አሳቴላ ቢሊቴታ።

31 ያሳ ቃላይ፣ «ሄሳ ጊሾ፣ አሲ ባ አዋኔ ባ አደው አጊዲ፣ ባ ማቼራ ኢሲፌ ዳና፤ ኤንቲ ናምዓይካ ኢሲ አሾ ጊዳና» ያጌስ።

32 ሃይሴ ጊታ ፀራ፣ ሺን ታኒ ሄሳ ኪሪስቶሳባኔ ዋሳ ኩላባ ሌሚሶ ኦሳዳ ኦዳይስ።

33 ጊደሺን፣ ሂንቴ ኢሶይ ኢሶይ ሂንቴ ማቼታ ሂንቴ፣ ሂንቴና ደሴይሳዳ ደሴቴ። ኢሲ ኢሲ ማቻ ባ አዚና ቦንቻናው ቤሴስ።

6

ናይታባኔ ዩሊዳይሳታባ

1 ናይቶ፣ ሂንቴ ጎዳባ ጊዲያ ጊሾ ሂንቴና ዩሊዳይሳታስ ኪቴቴቴ። ሄሴ ሂንቴው ቤሲያባ።

2 «ኔ አደጫኔ ኔ አዋ ቦንቻ።» ሄሴ ኡፋይሳ ቃሊ ዳዒያ ኮይር ኪታ።

3 «ኔ ሄሳ ፖሊያባ ጊዲኮ ኡባይ ኔው ኢንጃታና፤ ኔ ላይላይ ሳዓ ቦላ አዲቃና።»

4 አዋቶ፣ ሂንቴ ናይታ ጎዳ ቃላ ታማርሶኒኔ ኤንታ ካሌሶን ዲቺቴፔ ኣቲን ኤንታና ጫሚሶፒቴ።

ጎዳታባኔ አይሌታባ

5 አይሌቶ፣ ኪሪስቶሳስ ኪቴቴይሳዳ ሂንቴ ሳዓ ጎዳታስ ያሻን፣ ቦንቻኒኔ ሱሬ ዋዛናን ኪቴቴቴ።

6 ኤንታ ሲንላን ሳባ ዳማናው ኤንቲ ቤዒያ ዋዴ ፃላላ ኦሶፊቴ። ሺን ኪሪስቶሳ አይሌታዳ ያሳ ሸኒያ ዋዛናፔ ፖሊቴ።

7 አሳስ ጊደናሺን ጎዳስ ጊዲ ሂንቴ ኩሜላ ዋዛናፔ ኦሊቴ።

8 አይሌ ጊዲን ዋይኮ ጎዳ ጊዲን ኢሶይ ኢሶይ ባ ኦሊዳ ሎዎ ኦሱዋስ ጎዳፔ ዋይቶ ኤካናይሳ ኤሬታ።

9 ጎዳቶ፣ አሳ ሶምዎ ቤዒዲ ማዶና ጎዳይ፣ ሳሉዋን ዳዒይሳ ኤሬታ። ሄሳ ጊሾ፣ ሂንቴ አይሌታ ማንዳይሳ አጊዲ ኤንቲ ሂንቴው ቦንቻን ኪቴቴይሳ ማላ ሂንቴ ኤንታው ሎዎባ ኦሊቴ።

5:31 ሜዴ 2:24 6:1 ቆላ 3:20 6:2 ኬሳ 20:12፤ ዛሬ 5:16 6:4 ቆላ 3:21 6:5 ቆላ 3:22-25 6:9 ቆላ 4:1፤ ዛሬ 10:17፤ ቆላ 3:25

ጾሳ ኦላ ሚሺታ

- 10 ወርሴላን፣ ጎዳኒኔ ኢያ ገታ ዋልቃን ሚኒቲ።
- 11 ጻላሄ ጨሙዋ ኤቁታናው ዳንዳዳና ሜላ ጾሳይ ሂንቲው ኢሚዳ ኦላ ሚሺያ ኡባ ማዒቲ።
- 12 ኦ ኦላይ ኣሳራ ገደናሺን ሳሎን ዳዒያ ቲና ኣያና ኦላንቸታራ፣ ማታ ኣዋታራ፣ ሃሬይሳታራኔ ሃ ቋማ ኣላሚያ ዋልቃታራ።
- 13 ሄሳ ገሾ፣ ኢታ ጋላሳ ቲቃናዉኔ ኡባ ፖሊዲ፣ ሚኒዲ ኤቃናው ሂንቲ ዳንዳዳና ሜላ ጾሳ ኦላ ሚሺታ ኡባ ማዒቲ።
- 14-15 ቱማ ፃሳን ዳንጮዳ ዳንጨዲ፣ ሂሎቴላ ፀሩሬዳ ቲራን ዋሊዲ፣ ሳርቴላ ዋንጌላ ሂንቲ ቶሁዋን ጫማዳ ኣሊዲ ሚኒዲ ኤቁቲ።
- 16 ሄ ኡባፌ ኣሊዲ፣ ጻላሄይ ዬዲያ ላዒያ ታማ ደንጌ ኡባ ቶይሳናው ዳንዳዒያ ኣማኑዋ ኡባ ዋዴ ጎንዳሌዳ ኦይኪቲ።
- 17 ጾሳ ኣቶቴላ ቢራታ ባርኔፃዳ ሂንቲ ሁዔን ዋሊቴ፤ ቃሲ ገሻ ኣያና ማሻ፣ ኢካ ጾሳ ቃላ ኦይኪቲ።
- 18 ጾሳ ኣጎፊቲ፤ ሃራታሰካ ጋናቲቲ፤ ኡባ ዋዴ ኣያናን ዋሲቲ። ሄሳን፣ ጌሻታሰ ሳሌቶና ሚኒዲ ኡባ ዋዴ ዋሲቲ።
- 19 ታኒ ዋንጌላ ፀራ ያሺ ባይና ቆንጨሳዳ ኦዳና ሜላ ጾሳይ ታው ቃላ ኢማና ሜላ ዋሲቲ።
- 20 ታኒ ሄሳ ኦላናው ኪቲታሰ ሃዒካ ቃሾን ዳዒይ ሄ ዋንጌላ ገሾሳ። ያኒያ ገሾ፣ ታኒ ያሺ ባይና ቤሴይሳዳ ኦዳና ሜላ ታው ዋሲቲ።

ወርሴላ ሳርላ

- 21 ታኒ ዋና ዳዒያኮኔ ኣይ ኦሊያኮ ሂንቲ ኤራና ሜላ ኦ ሲቆ ኢሻይ፣ ጎዳ ኦሱዋን ኣማኔቲዳ ኦሳንቸይ፣ ቲኪቆሲ፣ ታባ ኡባ ሂንቲው ኦዳና።
- 22 ኦኒ ኡባይ ዋኒዲ ዳዒያኮ ሂንቲው ኦዳና ሜላኔ ሂንቲና ሚንሌላና ሜላ ታኒ ኢያ ሂንቲኮ ኪታሰ።
- 23 ጾሳ ኣዋፕ፣ ጎዳ ዬሱሰ ኪሪሰቶሳፕ ሳርቴላይኔ ሲቆይ ኣማኖራ ኢሲፌ ኣማኒያ ኡባሰ ገደ።
- 24 ኢርፖና ሲቆን ኦ ጎዳ ዬሱሰ ኪሪሰቶሳ ሲቁያ ኡባራ ጾሳ ኣቋ ኬሃቴላይ ገደ።

6:14-15 ኢሳ 11:5፤ ኢሳ 59:17፤ 52:7 6:17 ኢሳ 59:17 6:21 ሃ.ኦ 20:4፤ 2ፃዋ 4:12፤ ቆላ 4:7-8

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5